

Il cussegl federal risguarda ils purs grischuns

DA MAGDALENA MARTULLO,
CUSSEGLIERA NAZIUNALA PPS

L'agricultura en Svizra vegn decidida a Berna. En casa federala vegnan ils pagaments directs, la protecziun encunter products favoreivels digl'exteriur e las entradas da nossas famiglias da purs fixai. L'agricultura svizra ei per la Svizra da fetg gronda muntada. E tuttina dattan ils puresers gronds ella Bassa mintgaton pli fetg en egl ed anflan dapli suatientscha tier ils politichers e l'administraziun ch'ils beins purils pli pigns. Sco cussegliera naziunala dil Grischun eis ei mia incumbensa d'adina puspei render attent alla situaziun speciala da nies cantun e dallas regiuns da muntogna. Quei ei impurtont surtut el turissem, el sector dils tscheins d'aua ni sco gia menziunau ell'agricultura. Per cletg vegnan las fatschentas che pertuccan l'agricultura tractadas el cussegl naziunale ella cumissiun d'economia nua ch'jeu sun representada sco suletta Grischuna. Dalla cumissiun fan era part il president dall'Uniun purila svizra e dalla Federaziun svizra d'engarschaders da vadials.

Dapi l'entschatta digl'onni ei Guy Parmelin, cusseglier federal dalla pps, responsabels per l'agricultura. Siu antecessur, il cusseglier federal dalla pld Johann Schneider-Ammann, ei s'engaschad a moda



agressiva per in'avertura dil marcau (pia dapli imports favoreivels) ed ha provocau cun quei agir in conflict cun ils purs. Cun Guy Parmelin ei uss in cusseglier federal schef da departament ch'ha sco viticultur atgnas enconuschientschas e simpatias per l'agricultura e che crei egl avegnir dall'agricultura svizra.

Quei ei impurtont per quei ch'ei va ussa per la Politica agrara 22+. Quella duei definir las reglas per l'agricultura valeivlas da 2022-2025. Duront la davosa sessiun hai jeu per quei profitau dalla caschun e sun ida ensemen cun Thomas Roffler, il president dall'Uniun purila grischuna, tier nies cusseglier federal. En siu biro en casa federala havein nus informau el en special davart ils quitaus dall'agricultura da muntogna e dils purs grischuns.

Quei ein ils pli impurtonts messadis che nus havein tematisau cun cusseglier federal Parmelin:

Primo ston las entradas d'in pur tonscher per viver. Era el territori da muntogna sto ei esser pusseivel da menar in bein puril sco menaschi da gudogn principal. Secundo astga la PA22+ buca caschunar dapli administraziun. Ils onns vargai ha la lavur da biro administrativa dils purs priu tier adina dapli e las reglas ein vegnidas pli e pli cumplacadas. Quei sto vegnir evitau. Terzo eis ei impurtont che las contribuziuns per surfatschas teissas vegnien mantenidas. Quarto ston ils numerus projects da meglieraziun el cantun vegnir susteni sche pusseivel era dalla confederaziun. E per finir havein nus aunc renviu el al fatg ch'ina cunvegna da basa cun l'UE periclitass massivamein ils purs svizzers.

Igl ei stau in fetg bien discuers cun il minister dall'agricultura Parmelin. El ha realisau con impurtont che la tenuta d'animal e l'economia d'alp ein per l'agricultura dil Grischun. Nus essan perschuedi ch'el ha percepiu positivamein nos quitaus e ch'el vegn a tener endamen las particularitads dall'agricultura el territori da muntogna ed el Grischun. Ussa va ei per la realisaziun concreta dalla Politica agrara 22+, all'entschatta ella cumissiun responsabla, lu el cussegl dils stans ed el cussegl naziunale. Thomas Roffler ed jeu schein buca luc!